

PERSIAPAN DAN SAMBUTAN PERINGKAT NEGERI

Jika ditinjau pada peringkat negeri, banyak persiapan diatur oleh pelbagai pihak. Contohnya dalam akhbar *Utusan Melayu*, 29 Ogos 1957, memuatkan berita tentang persiapan petani di Kedah serta menabur bunga emas dan perak dalam perayaan kemerdekaan. Bunga emas dan bunga perak yang berbentuk kecil sebagai bunga lawang akan ditabur pada majlis perjumpaan beramai-ramai penanam padi dan ahli Syarikat Kerjasama Kedah Utara bagi menjayakan kemerdekaan Tanah Melayu. Tindakan ini dibuat dengan harapan benih-benih padi ini akan tumbuh dengan subur sebagai bunga-bunga emas dan perak serta kehidupan petani akan lebih makmur. Bagi tujuan tersebut, hampir 30 tahlil emas dan perak ditempah untuk ditaburkan.

Di Kangar, Perlis pula rumah-rumah dan kedai yang dihias sempena sambutan Hari Kemerdekaan akan diberikan hadiah. Turut diadakan majlis memberikan makanan kepada kanak-kanak serta olahraga, di samping pertunjukan kesenian dan kebudayaan. Pada 31 Ogos, syarikat-syarikat bas di Kedah dan Perlis mengeluarkan hadiah kepada semua pekerjanya termasuk yang sedang bercuti. Seramai 600 pekerja bas menerima \$6 seorang pada hari tersebut.

Di Pulau Pinang juga diadakan upacara menaikkan bendera Persekutuan Tanah Melayu dan menurunkan Union Jack, di samping bacaan doa selamat dan kesyukuran di masjid-masjid serta Kenduri Merdeka kepada golongan miskin. Turut diadakan acara wayang gambar percuma, pembacaan sajak dan pancaragam bagi menyambut kemerdekaan. Ucapan tahniah dan kesyukuran dibuat dalam bahasa Melayu, Inggeris, Cina dan Tamil.

Di Perak, acara perbarisan kanak-kanak sekolah, pengakap dan St. John Ambulans diadakan, di samping peraduan menyanyi, tarian orang darat, zapin, ronggeng, bersilat, wayang kulit dan sandiwara. Tujuh buah sekolah di Parit, Perak, mengadakan sukan, perlawanan bola sepak dan pada malam harinya acara aneka warna. Kerajaan Perak juga membenarkan orang ramai memalu tabuh atau gendang raya dan ketuk-ketuk selama 10 minit di masjid dan madrasah di kampung seluruh negeri Perak pada tengah malam 30 Ogos sempena menyambut Hari Merdeka.

Di Melaka pula diadakan sembahyang kesyukuran serta bacaan al-Quran dan berzanji. Hadiah juga akan diberikan kepada kanak-kanak yang dilahirkan pada 31 Ogos 1957 antara jam 12.05 tengah malam hingga 6 petang. Wang sebanyak \$180 diberikan kepada golongan miskin yang melahirkan anak di Hospital Melaka, Alor Gajah dan Jasin. Kerajaan turut diminta mengubah nama-nama jalan dan membaiki tempat-tempat bersejarah.

Di Johor, pintu-pintu gerbang dipasang lampu dan perbelanjaan \$40 000 diperuntukkan untuk menjamu golongan miskin, mengadakan hiburan, temasya sukan laut dan pertunjukkan bunga api. Peraduan Ratu Kebaya diadakan, di samping persembahan lagu Melayu asli dan lakonan pentas. Jamuan besar-besaran juga diadakan bagi meraikan Tunku Abdul Rahman sebagai tanda penghormatan. Turut dicadangkan acara Pengisytiharan Kemerdekaan di Segamat yang dibaca dalam empat bahasa.

Di Kota Bharu, Kelantan, disiapkan 28 buah rebana istimewa yang diperbuat daripada batang kelapa dan dihias dengan perkataan Merdeka dalam huruf Jawi dan Rumi. Sembahyang hajat turut disempurnakan. Perarakan nasi kunyit dan permainan tradisional seperti wayang kulit, menora, makyung, dikir barat dan gasing turut diadakan.

Di Terengganu, “Pesta Merdeka” akan diadakan selama empat hari berturut-turut mulai 31 Ogos dengan pertunjukan joget moden, rodat, boria, wayang kulit, bangsawan dan makyung. Jalan raya sejauh 10 batu dihias dengan bendera dan lampu. Tiga jenis semboyan dibunyikan serentak pada malam 30 Ogos. Tabuh Masjid Besar Sultan Zainal Abidin dipalu, semboyan *fire station* dibunyikan dan genta di Bukit Puteri diketuk.

Penduduk di Rembau, Negeri Sembilan, turut mengadakan kenduri dan bacaan doa selamat. Turut diadakan ialah istiadat barisan kehormat disusuli dengan Pengisytiharan Kemerdekaan dan pada malamnya majlis doa selamat dan jamuan diadakan. Perayaan juga diserikan dengan sukan padang serta pesta kesenian dan kebudayaan.

Di Samantan, Pahang, perayaan merdeka disambut dengan mengadakan pertandingan sukan darat dan sungai, jamuan makan dan tarian ronggeng. Dato’ Abdul Razak Hussein, Menteri Pelajaran merasmikan upacara ini. Rombongan Pengakap dari Kuala Lipis, Pahang, mengadakan lawatan ke selatan Tanah Melayu dan berada di Kuala Lumpur kemudiannya bagi meraikan Sambutan Hari Kemerdekaan.



Sebahagian daripada gambar sambutan Perayaan Kemerdekaan yang terdapat di Memorial Pengisytiharan Kemerdekaan di Banda Hilir, Melaka.

Sumber: Memorial Pengisytiharan Kemerdekaan.